

NGA WUS-AUSTRIA

RASTI SFIDUES I KOSOVËS ËSHTË GARA MË E MADHE STUDENTORE NË VEND

Prishtinë, 7 shkurt

Të enjten është mbajtur një konferencë për media e organizuar nga WUS-Austria në lidhje me projektin "Rasti Sfidues i Kosovës-Kosova Case Challenge". Rasti Sfidues i Kosovës është gara më e madhe studentore në vend, që në të njëjtën kohë është gjysmë finale për finalen ndërkombëtare Balkan Case Challenge. Gara studentore e bazuar në metodën e rastit studimor zhvillohet në këto katër raste: rasti biznesor, teknologjia informative dhe komunikuese, Modeli i Këshillit të Evropës dhe simulimi i gjyqit (studentët e juridikut). Studentët më të mirë do të shpërblehen me praktika, trajnime libra si dhe kompanitë pjesëmarrëse do rekrutojnë disa nga studentët më të mirë. Fituesit e garës do të marrin pjesë në finalen e madhe Balkan Case Challenge 2008 në Vjenë. But Dedaj, drejtor i WUS-Austria, tha se Balkan Case Challenge prezenton këtë vit gjysmëfinale në 11 vende të Evropës Juglindore, duke e vazhduar traditën e saj në Kosovë, Bosnje dhe Hercegovinë dhe Serbi, dhe duke u organizuar për herë të parë në Maqedoni, Mal të Zi, Moldavi, Bullgari, Kroaci, Rumani, Slloveni si dhe në Austri. Dhe në çdo shtet projekti vetëm merr parashtesën e vendit në vend në Ballkan. "Në këtë rast kemi edhe Kosova Case Challenge apo Rasti Sfidues i Kosovës që përfaqëson gjysmë finale për Balkan Case Challenge. Kosova Case Challenge 2008 është organizuar këto tri vitet e fundit, që nga viti 2004. KCC 2008 do të organizohet në një dimension pak më ndryshe se herëve të kaluara", -pohoi But Dedaj. Ai tha se Rasti Sfidues i Kosovës synon në hapjen e mundësive dhe perspektivave të reja studentëve të shkëlqyer të Edukimit të Lartë të Kosovës duke i forcuar lidhjet në mes të Edukimit të Lartë dhe punësimit si dhe me ofrimin e shanseve konkrete për punë. Ndërkaq, Rasti Sfidues i Ballkanit kontribuon që të rrit vetëdijen për potencialin që posedon Evropa Juglindore dhe Ballkani duke qenë pjesë e Evropës. Grupe të synuara të projektit janë student. "Rasti Sfidues i Ballkanit 2008 - 2010 fokusohet në institucionalizimin dhe standardizi-

min e BCC si një mjet i qëndrueshëm për lidhjen e Edukimit të Lartë dhe Punësimit me një fokus në Evropën Juglindore", -pohoi Dedaj, duke shtuar se kjo përfshinë një standard të lartë të garës dhe participantëve, një aspekt intensiv i punësimit dhe rekrutimit, sigurimi i mundësive konkrete të karrierës për participantët dhe pjesëmarrësit e viteve të kaluara, rrjetëzimi i të gjitha palëve të involvuara dhe një pjesëmarrje e përmirësuar e partnerëve dhe kompanive nga Evropa Juglindore dhe Austria, tha ai. But Dedaj shtoi se Kosova Case Challenge tashmë ka siguruar një stabilitet për tri vitet pasi që ka mbështetjen e Agjencisë Austriake të Kooperimit deri në 2010. "Në Kosovë rreth 50 participantë do të trajnohen në përmirësimin e aftësive të prezantimit, trajnimit për shkruarjen CV-së, sjellja e intervistë si dhe trajnim për ti përgatitur studentët në disiplinat garuese. Participantët garojnë në këto disiplina: Simulimi i Gjyqit është një simulim tradicional i gjyqit, ku studentët përgatisin zgjidhjen e problemit që ka të bëjë me ndonjë problem specifik të së Drejtës Ndërkombëtare", -theksoi Dedaj, duke shtuar se gara e Rastit të Biznesit sjell së bashku studentët më të mirë të biznesit, menaxhmentit, ekonomisë. Rastet studimore në këtë garë kanë të bëjnë me klimën biznesore dhe të zhvillimit ekonomik në Evropën Juglindore, tha ai. Drejtori i WUS-Austria tha se modeli i Këshillit të Evropës duke filluar nga ky vit zëvendëson modelin e Kombeve të Bashkuara të viteve të kaluara. Modeli i Këshillit të Evropës është një simulim autentik i Këshillit të Evropës i cili nuk është një trup legjislativ, mirëpo diskuton çështjet më urgjente si dhe negociacionin pozitiv të Unionit Evropian në raste të tilla si dhe jap udhëzime të përgjithshme sociale, ekonomike dhe politike në të gjitha fushat e aktiviteteve të Unionit Evropian. Gara e Rastit në Teknologjinë Informative dhe Komunikuese simulon implementimin e TIK-së në ambiente biznesore. Pjesëmarrësit duhen që të analizojnë procesin biznesor dhe infrastrukturën e kompanisë si dhe të sugjerojnë një zgjidhje.

Ismail Shabani